

CARNAVAL NA PLAYA GRANDISIMO Y LARGISIMO

ORANJESTAD(AAN): Un total di 23 grupo di carnaval cu 3401 participante (registra na SAC 3392) a tuma parti den e parada di carnaval di Oranjestad cu a cuminsa 11 or mainta y termina te 8.30 or anochi cu yegada di ultimo grupo.

Un parada cu sigur a kibra tur record, aunke e ta ser compara cu e parada di carnaval 25 di cual masha poco hende por corda ainda su duracion y largura.

Den e parada tabata tin mescos cu na San Nicolas di grupo di 1001 Anochi Arabe cu tabata di Colegio Arubano y esun di Dr. Kitch (Eddy Laaf) cu a hacj un tremendo comeback cu e grupo aki.

Hospijolles cu nan Fantasia di Molina e aña aki sigur a impone nan nomber den e lista di gruponan grandi di Carnaval y nan a presenta sumamente bunita e aña aki.

Tabata conoci di antemano cu Silvia Lourens lo no a presenta en grande y apesar di esey toch a logra pone 100 miembro riba caya den un bunita grupo luhoso.

Dos grupo sigur cu a keda aprecia den parada tabata primeramente esun di Holiday Inn cu a bira verdaderamente e hotel di carnaval di e aña aki for di su 40 days countdown te cu ayera cu nan actividad grandioso riba beach.

E otro grupo tabata di Playa Linda cu Riquezanan di nos isla. E dos hotelnan a pone paso pa otro hotelnan tambe forma grupo di carnaval pa pueblo por mira participacion activo di hotelnan den parada tambe.

E grupo cu a impresiona hopi tabata Astec Fantasy di e Arubianonan residencia na Merca y cu a haya e "sabor carnavalesco atrobe" y ta bay prepara na nan regreso mes ora pa nan siguiente participacion na Aruba.

E mariniernan cu tin por lo menos 25 aña participando cu nan grupo, musica y carosa anualmente a sorprende tur hende cu un di e mihor gruponan di Mariner den hopi aña.

Bunita grupo di vikingo, cu

musica excelente di Energy Brass y cu animacion y entusiasmo completo di e participantenan. E aña aki e mariniernan no tabata desor-

ganiza y bulando pa loco, pero mas bien bon organiza como grupo y cu un carosa masha bunita.

Otro grupo cu a impresiona

tabata di e Arubianonan residencia na Hulanda, Fantasia di Universo cu tabata entre e gruponan luhoso.

Masha aprecia tur hende a

keda cu participacion di e grupo di Rusia y di Republica Dominicana.

E grupo di Rusia a participa na San Nicolas y anochi mes a sali pa Curacao pa participa den Gran Marcha, y e Grupo di diablonan tradicional di carnaval di Republica Dominicana a participa tanto na San Nicolas como na Playa.

E grandinan di e aña aki a resulta Coastal cu "40 years carnival music", United Carnival Group di Shell cu "Aruba nos orgullo" y grupo di John Flemming cu La Cabana, "Aruba nos ta prome".. E tres gruponan aki tabata esnan mas den e competencia di titulo di Grupo di Aña y cu a ser gana pa Coastal.

Den musica e aña aki no por keda sin menciona e impacto di Original Band den paradanan y cu a bira un di e gruponan mas popular di nos isla.

Quasi tambe a zona tremendo durante parada, mescos cu mayoria di e gruponan grandi, pero tabata Eclipse cu for di Theolinda a laga sa cu nan tey, pasando despues den varios oportunidad grandi principalmente cu Tighter y Roots a mira nan esfuerzonan carnavalesco corona como Banda di Aña.

Los Laga bay tabata Los Laga Bay di custumber cu nan animacion y na San Nicolas a logra nan premio tradicional di Most Jolly Group, pero e aña aki cu competencia di Vikingonan y Biblioteca Nacional.

Aunque e carosa di Camacuri group a percura pa risa canto di caminda, e aña aki ningun di e gruponan comico cu carosa no a impresiona cu nan tema.

Savaneta cu Nos Mondt tambe a impresiona e aña den parada y masha bunita tabata nan Juwana Beer cu a wordo hopi comenta.

Aruba a goza di un carnaval excelente, luhoso, anima, largo y cu a dura 9 ora y mey riba caya, un ruta nobo cu a resulta satisfactorio ademas.



**NUMBER DI FAX
DI DIARIO
28551**